



涇野先生文集卷之二十八

墓誌銘

明奉訓大夫霸州知州北橋劉君墓誌銘

君姓劉氏諱璋字尚德別號北橋延安中部縣原村人

誥封中憲大夫彰德知府前義門巡檢諱景者之子都察院  
左僉都御史諱聰之弟前刑部郎中仕之父也仕主事刑部  
時予任翰林脩撰君知南和縣未幾自南和入京來得數會  
晤於宣武門東義氣輒相許可予子今舉人田適無室問君

第五女君即與妻之越數年今南京右通政綏州馬子汝驥方以翰林編脩出爲國子監司業亡其室問君第六女君亦與妻之今年九月仕先以大獄事謫戍柳州

恩詔宥還聞君之訃道過金陵托通政撰狀請予銘嗟乎道義之交婚姻之締予安能忍銘又安能忍辭哉君之爲南和也邑當直隸之衝諸務旁午戴星蒞政至忘寢食一事未竟亦不公退澧河自邢臺來縣分爲六渠閘廢久湮乃選人掌籍度田程時引灌郊垌民沾其利比小江南語在學士棠邑穆公記中縣十七社十社土著舊民餘則

國初山西徙來者舊民故有田又先奉例墾荒不稅於是民

有新舊田有多寡稅有盈胸兼以富者市田遺稅貧者田去稅存邑民阜罷常相懸也君諭父老躬文丘畝田稅相證貧富咸獲民率歸業陳狀撫院於是真保廣大四府之田亦因以均焉又嘗括闔邑糧數計八千之價而一之部者分歛其倉之數而輸民不知倉稅無二價昔時異價兼派之弊頓革而完恒先諸邑矣士習媮窳賢科久之君首建廟學延師立會分經考業增置名宦鄉賢二祠又計百家建一社學凡七十有八月朔縣試歲考其成弦誦之聲洋溢四封過者褒加後遂有登第者焉邑廳事亦久敝陋君曰我若辭勞後爲斯役者寧不厲民乎乃鳩材憲功偉壯倍昔廨舍移庫煥然新

美家宰增城湛公亦嘗記之然尤加意種馬禁其私乘勤自  
點牧以較肥瘠三年孳乳有馬蕃庶御史巡視見駒駿充斥  
深加稱羨亟馳薦剡初

先帝南巡道路迎送諸繁劇移迎

今上駕過沙河凋弊令不任事上官委君署篆旬日而辦先  
則取諸妖僧之募材以備

行殿之用後則南和民以樂于協恭也凡君諸所營建費省  
而不擾功立而日不惕者皆若此故君至南和倉廩不繼比  
任五年積粟二萬緣堦萬樹絡繹予謫判解州時路過南和  
行數十里皆在蔚蔭中而道外田疇暢茂真爲樂土當有蝗

蝱不生鷄犬寧之詩故王巡按鈞謂諸州縣曰作官當效劉  
南和也乙酉陞霸州知州州邇京邑人多豪俠民亦慄悍君  
懲其一二魁黠闔郡肅然城卽九河故道歲十九潦田多淹  
沒劫盜頻興異特大夥流賊皆出於此除之復生素稱難治  
君乃禁奢抑競平役薄征而又演武練兵嚴拾遺法居且四  
年水不爲災城北牛沱河遠徙一舍民饒衣食盜亦衰寢君  
子謂君子天有感云馬副使嘗失兵備印百方未獲君爲禱  
諸城隍之祠得屋後深入地中尺已而又失又禱乃又得之  
輒坑中其地與輓皆若未動若遇旱禱雨輒應南和及霸皆  
然人以爲君之純誠云乃己丑得致仕還鄉修建祠屋敦崇

時祭治圃橋山之麓游息其中嘗遭歲歉出陳貸濟而又倡引沮水灌邑東田鄉閭窮餓咸依賴焉若乃撫強知縣之孤館閭行人之家完男女之怨曠篤故舊之友愛內無私孽外無私行禮賢好義節用敬賓蓋有古人之風學者皆稱北橋先生云初君之生神采冲異髫童端重受學仲兄中丞奮厲刻苦析理必精或徹夜不眠及中丞舉進士復受學于前邑尹任御史儀益造博雅他日中憲公還自義門伯兄玫明農中丞宦遊君獨奉親承順顏色侍疾恒不斲枕身任家政業日充裕改建宅第高朗令終伯兄剛急或加呵責絕不爲忤師事仲丞終身不改其訓諸子姪必稱古道姪舉進士職部

署矣猶臨之益莊若誨門下諸生勤儉不倦尤敦實行門人馬隆登鄉舉仕爲推府執弟子禮事君如父可知他矣正德己巳君當歲貢以親老默讓次年又以母高恭人之命始與計偕明年庚午舉順天高等他日中憲公命析居輒辭美利不取別構宅南城僻地顧諸子曰惟願諸汝輩成立耳後高恭人及中憲公相繼捐養君號擗哀毀幾不能生然則南和霸州之政豈其無本者哉始祖任元爲萬戶萬戶生澤澤生簡簡三子君傑國傑邦傑諱國傑者君之高祖也曾祖諱慶榮俱隱不仕祖諱準縣學生高允執禮嘗署學印邑人士翕然宗之配神木折氏河南僉事昇之女是生中憲公者也則

君固源流遐遠而有祖之風格者乎君先配張壽官俊之女以刑部貴贈安人繼李氏吏目旺之女封安人男子四人長卽刑部辛巳進士政事氣節士林稱重娶宋氏封安人次价次倬俱 秦府典膳价先四年卒娶高氏倬娶宜君常氏次儒舉人蓋嘗倉卒被盜獲乃以身蔽君而獲免者也娶高陵李卽予室之姪女云女子七人一適邯鄲訓導張元傑二適典膳馬鋪三適宋澤四適洛川歲貢生王經五六見前七在室張出者子女各四最後三女李出也孫男子五人光裕光大光亨光升光謙孫女子六人曾孫男子三人訖諡韶君卒于今年丁酉四月八日詎生成化六年某月日享年六十有

九歲仕歸將卜某年月日合張安人葬于黎原鏃子坪是宜有銘銘曰 於維北橋抗志伊高發言有則威儀不佻鄉已中式卷額被剽奮厥材藝猶舉京兆莅南和民如赤子保旣砥田稅亦衡諸徭百爾廢墜罔不咸攝陟守霸郡民用思饒誰比誠悃田弗水漂行且三載盜是用消亶其獲印崇不能妖通判爲戾罪非已招高卧橋圃一義嶢嶢宜爾孫子儕輩邁超載厥休問百代如瑤銘茲貞石以戒後驕

明福建左布政使質菴范公墓誌銘

質菴范公之歿也其子舉人永宇兄弟自桂陽寓書金陵曰往年字母何孺人歿涇野子旣銘之石矣茲父之銘諒亦不

靳乎并以前郎中閩人林炫狀來予嘆曰嗚呼質菴公乃未  
究其志而止此邪按狀公諱輅字以載別號質菴初號遠谷  
子再號三峰柳州桂陽縣某里人也生有奇質長益英邁登  
正德辛未進士筮仕行人是時諸所差遣多徇于謁而職司  
其居者顧或不與君即上封事引明前典至以冗負自讓侵  
官諷人於是使事復舊風采摠著嘗使蘭州再使崇府皆禮  
成即返無所滯滌家宰遂菴揚公稱其學識氣節度越等夷  
甲戌選授南臺理刑明年授雲南道監察御史首言 建儲  
以安 宗社謂

先帝御極

榮王留侍宦瑾亂法致之去京今當妙選

宗室備

儲貳位俟有

青宮然後分茅至引宋韓琦

懷孔光傳以上仁宗而其馳騁騎射服習戎陣不御

深宮孤立可畏諸語聞者縮舌是時軍官簡文王忠怙勢凌  
辱監臨主事至搥殺其隸人太監黎安遘隙 寧淮二府至  
折撻其長史南京守備劉瑯貪婪暴虐至今都人罷市切齒  
刑曹郎中聽富民折產之訟至受寡婦之金而徇偏私公皆  
歷疏指劾乞正大法南都稱快其論納馬姬事比擬過直尤  
人所不敢言者也丙子冬奉

勅清理江西時逆濠雲焰方熾有勸公避難者公引埋輪事  
以行至未數旬即論濠優秦榮僭侈居如 王宮繼論濠令

三司朝服慶賀茂棄典禮乃又劾太監畢真附醜仇正瀆貨無厭都指揮郭宇傳泄諸司消息罪狀重多且請

武廟或出郊原嚴警蹕敦扈從以防不虞當其風采人或比范滂云然真宇皆濠黨也濠真使人遮留公奏各先誣奏公離間骨肉誹謗

宗藩公巡歷至贛被

旨拿解繫獄拷掠幾斃值

聖駕北狩縲紲七月後送法司議罪復值

聖駕南巡又淹繫經年始謫龍州宣撫司經歷爾乃脩崇禮信均平賦役又使知送死之道以感化四夷未幾逆濠及真瑯相繼以叛誅論者謂公有曲突徙薪之功交薦十餘疏辛

已

今上登極

詔復原職送者填道泣別名其厓曰滴

淚厓閱月即陞漳南兵備僉事四閱月又陞饒州兵備副使

蓋殊擢也饒州東湖盜之淵藪也公議設官兵於康山以控

制又禁遏

淮府群校之恣橫乃脩饒城及萬山東鄉二城

創置安仁一城皆經畫有式出納明允而又築湖堤以壯學

宮增涌澤以掩貧飢焚庫皮以祛積崇威惠大行信義昭著

盜戢民安屹然一方有郡守乖禮因公面詰遂生荆棘且嘗

見忌鄉宦構興讒謗流布遐邇言官論列漫及於公公即懇

疏乞歸雖撫按交留旌薦亦皆不顧未幾一巡察使

奏調公南贛以便行事公曰監司改調屬官宴然綱紀解矣



遂三疏得

旨致仕饒人刊遺愛錄以傳公歸杜門課子當路故知片札不通三年一日也已丑尚書胡公永清薦起公密雲兵備副使尋轉本司討鑛賊有功獲

賜金帛是冬陞陝西叅政分守隴右駐劄鞏昌協勦西蕃板兒等族再荷

賜金七閱月陞福建按察使過家省母朱夫人承歡月餘母忽遘疾不起居喪哀毀數日不食服闋巡撫汪公珊薦公與唐公鳳儀爲全楚長材乃甲午春復起山東按察使撫按交薦秋陞浙江右布政使藩務叢雜乃未明振衣日中退食形

神頗瘁丙申陞福建左布政使七月涖閩精神頓減歸思屢興十月二十六日遽中風痺越三日卒於正寢嗚呼傷哉公和厚精確遇事敢爲勇不可奪事母至孝獄病中形之於詩撫兄孤女極厚嘗携養一甥於宦所捐積俸貲立置家廟序刊族譜周族人之不能婚葬者叔珏卒於金陵貧鬻其子公贖之以還又歸其喪鄉友許君愷卒於塗疫躬爲殯殮至於辟薦名賢如恐不及雖處鄉州盜寇亦皆有策然則御史之風烈藩臬之樹績豈偶然哉公配何氏先卒舊無妾赴山東過徐始納一妾曰張氏公卒之五日自經以從之亦異矣乎子男四永寰貢於鄉永宇永官相繼登名鄉舉皆嘗從予遊

永宋業儒女一適醫官郭畋孫男五時畋時救俱邑庠增廣  
生時敷時敷時徹尚幼孫女六曾孫男二元默元熙公生成  
化十年甲午九月十一日享年六十有三所著有質菴稿及  
續稿若干卷藏於家永寰將以某年月日合葬何孺人於某  
山之原是宜有銘銘曰

嗟乎御史之難能也士風之邪正世道之隆替關焉夫彈劾  
其職也當其有勢恐忤權而違時也或逡巡而避之當其無  
勢恐寡言而曠官也或搜剔而論之夫薦賢其職也當其高  
賢恐其或拂人也姑隱忍而已之當其未賢恐其未合人也  
或夾帶而辟之於是豺狼恣於當路蛆蝻齒於臚仕士風以

邪世道日替憂

國之士每切念焉范方伯之初爲御史也侃侃乎其嚴辭也  
庭庭乎其正色也斷斷乎其履公也是故寧論劾劉瑯畢真  
宸濠諸奸雖瀕于死而不悔而不欲以迂說浮議之事姑以  
塞責而免禍寧論錄羅玘張吉王思諸賢雖寢其報而不怨  
而不欲舉鑽刺營苟之人姑以示恩而徼利得公數人布列  
臺省又何憂士風世道哉乃今云已傷如之何銘此貞石千  
載其不磨

明誥封宜人南京工部郎中李時昭配孟氏墓誌銘

昔予自翰林謫判解州道經曲沃李子時昭爲曲沃令在縣

有治績士民咸悅時昭邀予謁恭世子祠請留題于是杯酒  
談笑洽日皆阜俗愛民語乃陰重時昭之爲人未之或忘他  
日陞知予陝隴州音書又嘗通乃今已進繕部正郎其配孟  
宜人長逝持其友撰宜人狀以問銘誼不得辭按狀孟氏諱  
某父宣世爲滑縣名族母王氏湯陰人宜人天性慈惠真靜  
柔嘉內明外訥力勤行儉組紉膳具女紅皆精造年十六歸  
時昭舅竹軒先生方分教儀真再教襄陵宜人皆隨時昭于  
黌宮姑郭宜人甚嚴毅少不當意輒杖笞人宜人事之謹恒  
當郭宜人意郭宜人深喜其孝云諸姊姒見宜人事之當姑  
意也悉推服之宜人又恭遜謙抑無矜傲色即姊姒犯之亦

不之校終其身未嘗相忿矣諸姊姒稱其讓待時昭如賓禮  
時昭或怒則懼而退不敢質辯及有子女視諸妾子女無異  
已子女雅性不妬諸妾婢僕有過輒蓋之不以彰恐其遭笞  
也于是又盡當諸妾僕意樂其賢初竹軒先生自長安歸老  
也家甚清約宜人力紡緝操井曰勤勞力瘁無怨言時昭年  
二十餘始發憤力學每冬夜讀書以木綿子煨足足苦寒宜  
人手自煖之時昭感勵終夜不輟書聲數年學大進同伯兄  
德隆中式丁卯京闈明年遊太學宜人隨京邸踰年不越外  
闈人亦不聞其言每餘食或延賓不呼皆備雖德隆亦每爲  
人言其賢比歸滑家日饒裕宜人處之綽有規制嘉靖初時

昭尹曲沃宜人勸以公忠清慎時昭率感其言形爲詩傲歷  
官所在皆有政聲民懷之爲立生祠豎碑思焉亦宜人之內  
助云歲乙酉時昭擢守隴時諸子若孫森立宜人家居訓子  
未幾時昭迎于隴居半歲諸子復請歸滑自是終居滑矣及  
時昭二守鞏昌側室宋氏有女將笄乃留家宜人撫之愈于  
已出或唆之曰二十年糟糠之苦旣榮宦矣乃不隨任享其  
逸耶宜人即正色斥曰吾夫起自寒微幸有今日吾復偕行  
諸子失訓故君以綿微之力受重大之託詎爲遺糟糠耶况  
宦中更清苦乎彼俗以官爲榮忌專妾者吾不爲也家居十  
餘年家務秩然居常薄滋味諸子或慢遊必責之曰爾父以儒

振業爾等不能繼乎于是士儔士温肆力于學爲畿內名士  
馳聲場屋而諸孫亦駸駸然懋于進修使時昭無內顧之憂  
云每歲時服冠帔以拜祭平居過姻族則不用曰不可以貴  
加姻族也他日宋歿于南都柩歸滑宜人哭之慟曰宋善事  
吾夫婦夫之宦邸恃有宋存焉今已矣奈何乃感疾嘔血宜  
人少履貧困勤瘁嬰疾至是益深諸子進樂餌療之漸瘥比  
時昭上長至

表便道歸滑賓集事叢乃躬率諸婦調飪營辦勞憊疾發丁  
酉春卧不能起時昭限迫不忍別去宜人屢促之乃行是時  
士温不肯就試宜人疾少間促之曰兒第行吾疾廖矣温勉

從既數日宜人忽不進食索冠服曰將見祖宗于地下急喚  
溫歸吾誤兒科事矣諸子女環侍請藥亦不服歛曰命也遂  
卒于嘉靖十六年五月十五日距生成化某年三月二十七  
日享年六十歲生男子三人長士奇承差娶呂氏次士偉縣  
學生宜人卒娶仝氏李士溫選貢生娶王氏女子三人長  
適趙溱先卒次適陰陽官陳尚賓季適陰陽官馮相皆滑右  
族孫男子三人長一索次一桂太學生皆士奇子次一本太  
學生士偉子士奇等將以是歲某月日塋宜人于祖塋之次  
是宜有銘銘曰 有叔宜人居德孔那克開懿性婦職伊  
嘉事姑恭順相夫勤多耻隨榮外日理厥家宜有孫子藝行

如坡當其遠造奚啻决科載爾休問百世光華

誥封太宜人李母康氏墓誌銘

太宜人李母者今杭州府知府章丘縣李端甫冕之母也姓  
康氏父材悃質純至鄉閭信服母孟氏慈柔敬慎太宜人其  
仲女也克閑壺誡及笄歸贈奉訓大夫南京戶部員外郎李  
君秀時冕大父梅祖妣胡氏皆卒太宜人以不逮事舅姑惋  
恨每當歲忌旦恪修蘋藻潔奉禴祀贈君少爲章丘諸生家  
緒清苦夫婦鷄鳴昧旦綢繆勤生懋勉德義嘗夜誦齋中雨  
頽隣垣有艷女子來贈君儼容麾拒女子進曰深夜岑寂何  
復慮人曰鬼神昭昭無知乎女子慚歛已去後以他敗語人

曰李秀才真佛也故同輩呼贈君爲真白君云家爲馬戶從  
長群戶有負津助者爲代其等又嘗挾冕赴試歷下時有應  
試生路遺十金拾之卽標記候諸遺金所竟歸應試生應試  
生請中分以謝乃不受素好賓遊凡饌具楹太宜人必躬必  
豐雖桑蓬貧窶姻族單困者必勸周恤之贈君亡弟穩遺孤  
鼎鬲方稚嬰尤相撫之成立且與完室家贈君歿于正德己  
卯春太宜人發芻擊心蔬糲不御酒肉者終其身其閑居服  
被縞練殮餌麤薄躬領小姑諸婦職專紡績泉緼僅供苞約  
而已恒以絁繡織妙爲戒贈君嘗爲冕改造深青繒衣冕慚  
不敢衣及爲諸生猶衣弊袍若衣鮮麗衣則顏輒頽赭皆太

宜人之化也其教諸子女少有愆失輒楚撻之不少寬假至  
僮婢小過則又勿問嘗訓冕曰汝父蹇躓不逢吾嘗憤懣汝  
其夙夜篇典庶幾早揚以光李族乎冕竟以文修學成舉正  
德丙子山東鄉薦太宜人喜曰是足以旌嗣父志矣比春試  
不偶歸遭潦水暴至一室蕭然太宜安無憂色且解諭之冕  
乃拭淚携同志往業長白山體泉僧居祭未再不偶家僅小  
磨一座太宜人竟捐鬻之以資國監裝費乃登嘉靖丙戌進  
士太宜人又喜曰吾爲人母者事終矣此不可見君子于地  
下乎丁亥冕補魏令九月初與迎太宜人就養官閣見冕洞  
謹廉白乃慰之曰守官若是庶不忝于所生惟克有終爾辛

卯轉內臺癸巳春左遷倅鈞州甲午轉倅永平咸著美績乙未擢南京戶部員外郎是時太宜人七旬矣冕乃番宜人鄭氏侍養獨將二僮之官丙申閏十二月恭遇聖上誕儲覃恩太宜人始得

錫封乃嘔喻陶樂曰此吾教子之效也丁酉冬擢杭州知府冕之內弟來南致太宜人命曰去語吾兒吾幸無恙母以我故迂途還省郡守剖符專城重寄也過行以慰民望冕乃先郡蒞事尋遣史皂往迎并取諸孤太宜人堅不就迎呼語鄭宜人曰守勞旬中饋詎可虛也婦第往宜人乃偕孤子暨坦之二孤來郡番長孫黃中冕見太宜人不就養益愀戚不寧

冬十月得太宜人患滯下良瘥家音卽遣二孤歸省時太宜人亦遣黃中之郡言起居食飲安吉狀庶以慰冕思冕以黃中口述符徃言雖稍開悅然烏烏縈懷作惡方候解凍疏請終養而太宜人哀訃至矣卒嘉靖十七年十一月二十七日也冕所遣問安二孤亦不及生面太宜人抵家已瞑目二日矣端甫之政方大行于郡吏畏民服枕人咸惜父母之惠期月而去千里惻怛若奪哺乳云太宜人生成化元年十一月二十六日享年七十有四子男四人長晟殤夭次卽冕娶鄭封宜人次昇娶類少坦娶王先卒女子子二人嫁爲姜宗仇仲信妻孫男子八人黃中娶魏天中聘謝冕出執中娶華靜

中未聘，出建中娶麻虛中娶崔致中尚幼，坦出孫女子八人，壻徐更化韓鯨張大衍張汝楠尹自政馬本吉劉某冕卜某年月日奉太宜人之柩，合贈君塋于某山之兆，冕嘗從于游也。持蘇州舉人黃省魯狀問銘，銘曰：猗嗟李母，素履戩穀，旣配贈君，其人如玉，夜拒奔女，展矣慎獨，代筭群戶，遺金盡復，當其刑于宜母之淑，周貧濟急，惠先弟叔，紡績率家，編練是服，貞慈雙敦，閨範清穆，宜有端甫，趨道孔速，蒞杭未久，士民稱福，方置爾祉，云胡不錄，茲銘貞石，孫子歲歲。

明監察御史岑山程君之配方孺人墓誌銘

勅封孺人方氏諱孝真者，前監察御史岑山先生歙人程君

諱材之配，今簡州知州默之母也。初歙有結林與岑川相隔一水，世締姻好。方氏遷自羅田至濟南，太守以宦業顯于時，其兄美興公以貲財雄于鄉，濟南公試岑山君而奇之，遂以孺人許歸焉。孺人自幼警穎，旣歸于程，力佐家務，費及粧奩，岑山君方廩謁師，力不能具，誓乃卽卸簪珥，不靳也。舅清溪公治家嚴且儉，孺人恒節縮滋益之，家用饒裕。及岑山君登弘治丙辰進士，授推汀州，過家歸省，偶疾大作，孺人不解帶者月餘，疾始克瘳。赴汀州任，越一年而孺人始克抵汀，卽不肉食，以相其庶。他日岑山君偶出差，愆期，衙內絕糧，數日比歸，孺人嘻吁無言，默然暨安平三子，不敢仰視，亦無言。岑山君



獨撫安平門曰汝餓數日乎何不呼別衙一饋也孺人曰君以廉介自持身以冰蘖自誓婦無外事令不出閫名節所關生死罔計又胡兒女之恤耶岑山君亦嘻吁無言凡在汀二年日事紡績畜養鷄豚以充日用壬戌春岑山君簡授監察御史孺人秋亦赴京時默然隨侍出就外傳歸卽課讀率至夜分紡績以伴居二年岑山君清戎浙江孺人遂挾默然南旋正德丙寅岑山君卒于茲谿孺人傷痛幾絕乃遣默入浙舁柩喪事既終卽訓二子讀書無別營爲已巳春逆瑾積憾岑山君嘗發其奸謫流海南孺人遣默走京師語以委命安義然亦卒得以解因諭默曰諫官以直得譴固所甘也

聖恩汪洋猶得見宥非大幸乎汝輩努力以答至

恩及茲壯年須勤學精業親師取友可也遂遣二子師事姚江史先生厚其禮幣又擇程蘿山者以爲之友雖拔簪易肴亦不介意庚午默然同肄黌宮方值秋祭偶以覲歸孺人曰當祭先師何以覲爲無師是無親也聲色俱厲二子恐慄復出追祭丙子然舉應天經元乙酉默亦舉應天經元是時岑山書屋亦成孺人洒淚泣曰汝父九泉目亦或少瞑乎未幾然會試卒于嘉興之石門傷之甚未幾然婦又卒又傷之甚至丙申秋乃一疾甚殆一日幾不蘇旣蘇語默曰汝父旣亡汝弟又死今止遺汝汝得祿養吾心少慰昨若奄遊汝至三

公吾不見也去冬會試又遣人赴京再申前命故默下第遂就銓揀得守簡州走人復命孺人已卧床矣七月默歸拜床下孺人按摩冠服曰汝父死後不虞又見此也喜更少安越一月病轉劇遂以八月二十二日告終正寢享年七十有二歲生男子五人長煥次貴次即默然次照照即安平煥貴照俱早殤孫男子四人載吉太學生載道載嘉載考孫女子二人曾孫男子一人孟生孺人愷和貞懿勤敏寬裕事勢膠糾不振不撓適中肯綮上事舅姑得其懽心四時嘗祭必虔必拜屢遭喪變觸事哀慟目因失明其處宗戚必厚見人疾疢急難貧困必救必施不憚再三嘗有漂水瀕死者募人拯之得生家僮婢妾保衛極至默擇嘉靖十七年戊戌冬十二月

二十一日奉孺人之柩柩柩岑山君之壙合葬焉使其子載吉持舉人李景狀問銘銘曰 荷嗟孺人結林攸謨倒粧佐家助廉斷肉他或閉閣撫育冰檠之操鄰亦不告頓遭殷憂喪明以哭相夫執法教子以收婦道母儀文流之淑宜爾子孫傳芳棧棧

明南京工部右侍郎中梁張公配淑人呂氏墓誌銘

公諱羽字伯翔號中梁漢中之南鄭人也祖諱某配李氏父諱廣以公貴贈如其官配鄧氏贈淑人繼配楊氏亦贈淑人鄧淑人生公純孝長爲學官弟子員好學不間寒暑弘治辛酉年以書經領鄉薦乙丑登進士第以憂歸服闋授行人奉使西蜀無所辱命兼却其餽金一無所選先時受業師陳添福充戍遼東公恒念之一日有遼差隆冬險地諸行人苦不欲去公自請行且道有師在彼欲往候當塗義之乃卒全師

以歸是時冢宰舒公踈濶兩選不與人以勸公公曰窮達有命耳正德初宦瑾用事公獨不近瑾敗諸趨者皆被禍公始授御史遭流賊猖獗公經畧內外日夜戒嚴事平賚衣一襲嘗巡按淮揚山東刺舉無私比回所部吏以金餽正色拒之時宰以故人門生屬善視之之部按之則巨橐也蓋山東號三大害其中有二焉乃首劾去之會中官道芷游獵錫予頗濫公上疏曰明王慎德必矜細行不以禽獸病民尤當謹衣裳之在笥也遂寢不報舉朝皆壯其奏然終所得罪時宰出守廣平至則選賢良退貪殘施行條教胥吏舞文者痛繩以法吏卒畏懾莫敢仰視雖隆寒盛暑漏下五鼓必起視事夜

分乃寢訪獲積年民害充發配所餘悉以次徒遣然又和易近民視之如子盡得其情加惠于鰥寡衣食居處時親省因刻羅氏諭屬文以勵僚屬創建漳川書院群漳士高等者游業其中躬自督課聘屬官李一寧爲漳士時表漳士日嚮于學彬彬著于科目若乃郡中賢士大夫謝宦里居者不問崇早則往候其家問民疾苦舉行之遂建閘通水開田千畝以資困農 奏表趙氏以勵婦節嚴禁縣官阿稱以正士風便置木牌令得自白以達民情處劑方藥以濟貧病收積市利以蘇里甲當是時旁郡之訟咸願歸質廣平廣平視諸旁郡若大府焉吏有不法者率望風解組去順德囚母與僧通

子已壯不改惡其子之言也乃入井死會當決子公曰毋無  
行負夫與僧私通顧可殺子絕夫嗣乎因遂得釋鉅鹿有告

婦

奏一要宦暴殺其夫吏受委咸憚莫能決公按而寘

諸法要宦懼厚賂朱寧誣奏下公獄吏民爭斂錢賄寧爲公  
求解公曰吾寧失官不敢失志若等愛吾幸無枉吾志也大  
理直其誣乃還郡自後民益相信斷獄大省爲八郡最民有  
清水明鏡之謠撫按交薦有曰經綸之才冰檗之操有曰精  
敏之才而庶務克修公勤之政而一廉尤著近因緣事赴京  
百姓顛顛然望其復來可謂愷悌君子民之父母也如此者  
十數年河間守缺少宰廖公請于冢宰曰吾郡疲甚借願張

守一年比調河間士民泣而送之擁輿莫能行去之日民有  
遺思縣像而屋祝之者河間郡中無賴數十恃勢豪橫于鄉  
曲則召地方當甲者謂曰若爲甲不緝捕奸俠顧令橫若小  
民守姑貰若罪其密報以來于是武斷之豪悉斂迹改行郡  
中以清尼寺數十濁亂民俗乃廢其寺歸少尼于民之無家  
者即其地立社學教郡中子弟又收恤廢孤于養濟院郡中  
有故周卿者先守漢中性頗偏科舉士係府學者得給票過  
館係縣學者獨不予至使公徒步行赴省城及公守河間訪  
其家貧甚周歿時

朝廷予祭有司亦廢閣公移文給米八十石舊僚通判周禮

素清苦死而妻子貧甚負貸莫能償諸貸家日督之公乃延諸貸家以酒食曰若幸與周有鄉里分周故善吏也忍窘其妻子乎于是諸貸家多感動出券不復取乃擇隙地居周妻子親爲文祭周墓

武宗皇帝南狩有司供帳吏緣爲姦率陽散官錢陰歛富室惟河間據郡中以錢以治具軍民不擾供帳以辦時薦者有曰才識可以御繁力量可以任重河間廣平京師股肱郡素稱浩穰難治公至輒稱治聲名籍甚

今上卽位擢用良吏始遷公山西叅政分守大同有巡撫者不恤軍士穀尚未熟委官促糧軍民驚擾公入言不聽出即

遣牌弛其限期軍民始定巡撫不悅又暴動軍士築堡沙磧公固爭之亦不爲聽軍中已有異言畏公不發比公回省去不越月而變作張遂死焉及改守冀寧道者捕妖賊黨衆下之臬獄晉人無弗稱快尋轉江西憲使時省缺布政使有徐御史者薦曰張羽德量渾厚心事光明操行剛方方猷老練若舍羽推補別省官員是舍驥而索駑也公雖抱質敦厚生平不喜造請權貴當路嫌之乃左遷貴州至則出納慎防吏不敢私一日吏白積餘之金舊規不報公盡數登籍久之晉南京大理卿多所平反有疾乞休

上溫旨勉留未幾轉南京工部侍郎展修國學號舍數百間

窮治假印吏除奸惡數十輩又部主事王度嘗捕治京猾滕氏不法事王憂歸會考察被滕詭吏部欲黜王公曰滕之橫京師誰弗知者獨王能捕之願肯納其賄耶王得不黜先時經營吏率以裁省爲能市材率不予直即予莫能償其本衆苦之公三度給價而商無退怨尋再疏乞休會被推本兵時黠虜入寇三鎮告急乃不復敢言去頃之考績還以疾卒于淮上時嘉靖十二年十月二日也距生成化六年七月二十七日壽六十有四歲使公再求數年經綸康濟又何如也初公七歲時母病爬頭虫甚爲累公默取虫吞之虫不復生少受學于陳生甚嚴公時密歸省陳初恠之後知其爲母也益

加愛重繼母楊淑人年少公事之甚謹家貧好學雖群輩嬉戲手不釋卷性謙抑寡言衣服居處喜儉素平居未嘗言人過亦不喜虛美人處家教子嚴而以正每曰凡事讓入不可傲慢又曰溺愛返爲不愛撫教五弟皆至成立盡分祖業于諸弟居學與諸友取分膳銀任廩五人中有貧者公議均取諸友皆樂從贈公自什方歸頗貧公將赴省試辭贈公昔嘗貸金于邢不能償邢移書讓之贈公醉卧繼母泣道邢事公憤然曰公辱子憂何以試爲夜行三十里出曹償邢山路險阻帶酒夜行幾不利歸贈公覺大驚更與典地爲曹償行赴省其睦宗族皆有恩禮每遺書曰爲士者當自重勿入公衙爲

民者當守法勿犯有司母家子孫零落止有二孫牧牛于人  
公令其弟收養撫立相繼承管至于資給憲友邢恩旣貢入  
監而連取甲科憫恤吳聶二友病故旅邸輿歸其櫬若百戶  
陳璽襲職被盜裘箬來謁乃易衣醫療亦贖使完歸蓋公與  
人處恂恂若無所能而見義必爲萬折不回居常手錄先賢  
要語帖置左右以自警切雖年逾六十位至九卿見僕吏鄉  
人未有惰容予嘗以爲西漢周勃張歐之輩人也公心本純  
誠雖鬼神可通其舉鄉試會試之先皆有火光殞于庭院父  
母親見在學時友人蕭鳳妻迷于邪亂語不知耻公每至其  
門輒避匿曰張大人來也後諸友同以物鎮邪夜投磚石于

諸友號舍獨不敢犯公贈公居什方時病革公日夜奔泣比  
及界夜昏路不能辨忽有笛聲導之識路得至縣笛卽不聞  
時贈公幾死復生人以爲孝感神明使之然也他日巡按淮  
揚時泗州察院有妖劉御史者至夜驚擾不能寢公居數日  
且養病妖不復聞後劉復至不敢入召問守者云張老爹住  
時止見一鬼甚大捧藥跪床下耳然則公自行人御史以至  
廷尉司空所至効績豈偶然哉公配呂氏邑人呂公文通之  
女以公貴贈淑人呂淑人之歸也姑及庶姑皆在嚴甚乃躬  
操井臼脫簪珥以供朝夕逮旣貴猶著浣補舊衣攻苦食淡  
不少改其度也生某年月日卒某年月日壽若干歲生三男

子長重光舉人公在南京工部時嘗遣之從予游于薦峯東  
所然沉厚圓慎忠愨不伐綽有公風烈次耿光醫官次文光  
庠生女三長適生員唐子順次適生員謝涸次適百戶金第  
次室王氏生二女一適舉人傅以中一適生員唐倫耿光生  
子三長槐官生次桐橘女二文光生子一榛女一重光于某  
年月日已葬公于某山未銘槐入太學持狀請未獲應今年  
戊戌重光會試遇其友進賢舉人章詔又以禮幣促是宜有  
銘銘曰  
有碩中梁孝未成童吞蛭七歲母首免瘍聞父  
病葦葦走什方匪遇神笛父何以生凡舉科甲兆有火光巡  
按淮鳳崇不能殃山東除蠹忤及宰衡宰衡不樂出守廣平

懷民威吏如漢循良河間廖宰借守其鄉豪黠歛跡顯要亦  
懲被其讒賄下獄尤剛身雖顛沛聲則益揚旣參晉藩巡撫  
違經屢言不用回此晉陽撫公益烈行伍稱兵桀黠兇雲撫  
公被戕公晉江右綰綬憲長貴州稱屈進天下平旣少司空  
奸吏殄亡當其風采實王設肱天不憖遺乃遽淪喪縉紳悼  
惜哲人其傷銘此貞石子孫永傷

明贈徵仕郎禮科右給事中前扶溝縣史李君暨配  
封太孺人胡氏墓誌銘

君諱瑄字宗玉充府東阿縣張秋社人南京刑部郎中前禮  
科都給事中仁之父也以刑部在禮科時贈右給事中贈君



受性英敏垂齟誦書輒解大義父家世農不喜業儒乃令入  
皆爲按察掾贈君材能煥發受知上官顧數不樂其事弘治  
壬子選授扶溝縣史縣俗富豪健訟多盜賊巢令數不獲久  
任去贈君至懾篆擊搏豪黠舉稱廢弛案無留牘乃又構燕  
息之亭植荷埒菊羅栽名竹暇則札速摺紳耆舊樂飲其中  
因以謔詆民俗故凡折辭訊訟無能遁情乃又改建明道先  
生之祠以使士民伏臘禱祀縣有強盜久未緝獲會有明火  
劫人財去遺落毡帽人以白贈君贈君令人持洗于市帽匠  
見之曰此某人帽也汝奚得之人歸以告遂擒其賊并獲餘  
黨在縣五年攝篆三載吏民畏懷尋以母苗氏喪解任其歸

之日素衣冠送者自縣屬之河不斷服除改補順德之南和  
有朱尹者負氣陵轢僚佐諸僚佐多曲意事之朱益多鞭撻  
人以示威贈君聞若無聞焉朱後氣益張厲贈君乃從容曰  
卑高有常禮叅佐有常職今柰何徒苦左右示不廣乎人乎  
朱乃前執其手謝曰君教我矣厥後贈君罹疾朱爲建醮以  
祈福焉歲庚申當部秋賦入京賦有宣府邊儲適值虜寇宣  
大戒嚴或勸以支引無往贈君毅然曰吾職也即嚴冬  
出關身履沙漠左右慘然望見馬騎以爲虜至悲啼不休贈  
君獨無所動但以喻慰之卒亦無患旣歸入門家人驚其瘠  
甚且泣乃遽止之曰始吾不謂生入居庸關今已至此即死

猶爲不幸耶贈君長身脩髯議論明確初以資當得七品官以母老亟就祿養因失流品焉生于景泰乙亥六月五日卒于弘治辛酉二月二十九日享年四十有七曾祖諱長孩幼輒孤年方數歲元末兵起族人爭去鄉閭多無所歸乃獨逋居苦山入贅李氏後生子勝配于陶氏生子祥祥有心計常操竒羸身致碩富殖田三千屋數百楹配于苗氏生五男子贈君其第四子也是其先世敦信崇義醇樸務本蓄極而發積厚而顯乃至贈君躬被冲允率履無華篤生賢子邦之司直上馳天恩褒贈泉壤不偶然也配同邑胡氏亦以刑部在禮科時封太孺人太孺人之歸贈君也苗夫人尚無志太孺人務極孝敬飲食衣物身自執侍不委婢僕其在扶溝南和之時猶事麻枲絲苧以佐祿入及贈君旣歿其柩殯歛葬之具皆出經畫至履藝田疇課植樹圃多服其勞而其教刑部以隆師親友之道或稱述贈君遺言夙夜諷勵至使于義子共筆硯同甘苦焉若乃周急恤寡匍匐救喪皆其緒行耳刑部在行人時已迎養于京邸自是皆恒在任也今年九月四日以脾泄病卒于

御賜廊官舍距生景泰甲戌四月八日享年八十有五刑部昇柩歸東阿同贈君合葬焉乃托上寶卿李懋欽以問銘銘曰 有彥贈君天授伊嘉讜信自履侃侃不阿扶溝政美

亦憇南和移祀明道士風肆遐計獲暴客民用無訛部賦宣  
府慷慨稱戈虜亦無如之何嘗昇母柩送者如麻屬之于河  
厥配孺人媿德疇過宜獲

褒典存亡並華况茲刑部秉直不那纘戎休問千載不磨

王生德誠墓誌銘

王生者吾年友刑部員外歛人黃羅君之子贈君一舫先生  
之孫也黃羅君請予爲一舫齋題辭謂予能說一舫齋也於  
同年中獨厚于予比旣歿未獲究其才也予甚悼惜之他日  
予典成均事其子南道御史德仁獻芝來辭且言予監規過  
嚴非文武弛張之道也予受而改之乃私嘆曰斯御史也他

日必以謹言鳴于時矣黃羅君其有子哉未幾改官南道德  
仁又使其弟德忠從予遊獻蓋負志英邁端慤不苟予又私  
嘆曰斯生也他日必以直躬鳴于時矣黃羅君其有子哉尋  
獻蓋告歸思予復來以德仁之在浙差也不得已又告歸且  
爲其兄德誠索墓銘曰德誠自少篤志儒業家人每以其軀  
弱爲患也多方沮之持志益堅與獻蓋受業于德仁兄互相  
講習雖祁寒盛暑不爲少廢間得古今文字之善者必手錄  
之積至或篋自六經諸子至天文地理養生之書靡不涉獵  
爲文每滾滾數千言詩賦尤所長也嘉靖辛卯臺選應試第  
一己補郡庠生然爲人質而不俚儉而不固恒衣布帛衣或

問之則曰適體足矣尤喜敦義排難解紛振孤恤寡往年從  
兄獻茂偶有危禍屬于有司君力排之賴以寧息又從兄蚤  
死而無後宗人有利其有而覬覦之者乃謀諸兄弟告于大  
守擇其所親愛且賢者以立之生平不滯于酒色嘗肄業崇  
樾偕諸友晚眺溪側去館數里許友入酒肆携妓酣歌君獨  
坐橋亭候至三更乃復及應試南都或又有誘之者特立不  
亂且虛已親賢不以富貴驕人亦不隨世作炎涼態接人必  
以誠實所交多一時俊誼人或犯之終不以校戚服其量居  
常恂恂若愚無以悅于人者及死之日郡大夫士無不悼惜  
之夫德誠雖蚤歿然學已至此使天假年真可以追逐德仁

而與獻蓋並馳也宜乎徽中人以爲王氏三鳳云豈非黃羅  
君之有子哉夫黃羅君學究未盡施語所謂不任其身在其  
子孫者果然乎初王氏之先世有爲金紫光祿大夫獻公者  
世家祁門其後有諱祐者始遷歙之嚴鎮以至于今子孫繁  
庶爲鎮巨族至一舫先生諱瑗封工部主事而黃羅君諱寵  
登正德戊辰進士居官屢著善政配方氏封安人側室劉氏  
生獻蓋蓋王氏自獻公以來世以慈儉義方訓後昆宜至黃  
羅君發而未盡又有此三鳳也德誠名獻葵其友號爲樂川  
亦嘗謁予于鷲峯東所者也生弘治甲子三月十八日歿于  
嘉靖乙未四月三十日享年三十二配旃溪太學生張君紳

之女張質直好義德誠歿之後與其媵妾汪氏秉禮守節共誓栢舟之志可以懲善人之報矣予二曰夢龍聘新安衛于氏曰夢書聘信行汪氏女二曰綸音許聘托山程尚室曰詔音未許聘皆張氏出也獻蓋領母兄之命權厝于尹庄之陽其友鄭統叙其平生因爲之銘

銘曰 嗟歎巖鎮右姓維王黃羅法曹經學允明未究厥用且艾而行爰生三鳳爲歎之光孟季咸永葵也獨亡孝弟在家忠信在鄉天靳名士喪此文章遺行皎皎巖然尹庄銘茲貞石休問常芳

明故奉直大夫刑部陝西司郎中黃君墓誌銘

君諱志達字成章別號東川晚更鶴翁其先故汴人也宋靖康間扈從南渡遂居建康 國初再徙漂水之唐昌復遷

于迎薰之西坊子孫因世家焉曾祖諱伯儒潛德弗輝舉邑大賓祖諱桂翰粟拜散官父諱份好義樂施儻爲鄉閭所宗不求聞達人以樂隱先生稱之配張氏方君之在姪時張屢感異夢甫九歲遣就外傳凝重有大志不爲嬉戲日讀數百言輒成誦授孝經大學卽能了大旨時府丞寶應冀公選俊秀以充庠序集者百計君與列焉冀素精鑒別一見君重其氣宇遂收補庠生比弱冠銳志潛修博極經義尤邃于易闡明先賢未盡之意務歸于理執經叩問者屢滿戶外如今

成都通判王君希成信豐尹徐君鑾皆出自門下者也時督學憲臣浙江王公因試得君文大爲褒賞至稱以爲江南之傑是秋果領順天鄉薦高等將計偕春官值張孺人卧疾乃日親湯藥不解帶者兩月或勸之北上以圖春試君曰寸草之心昔人所懷况以身外長物而可易吾昊天之報耶孺人竟以疾終未幾樂隱翁相繼而逝君連遭兩艱徒跣枕塊痛哭毀瘠幾不能生歛葬之儀悉遵朱子家禮不用浮屠鄉人多化之同予舉正德戊辰進士授刑部湖廣司主事時宦瑾煽權諸司章奏率先關白奉行唯唯君曰倚法以逞毒吾嘗不忍也誣法以取榮吾所不能也惟持公恕剖判明決

不沮不撓法用是平大司寇陽曲張公素慎許可獨雅重君注曰執法而堅獨立之節讞獄而求不盡之情天官書最授勅階進文林郎贈樂隱先生暨張孺人如其官正德庚午歲武皇帝軫念淹獄致于和氣命刑部推選聞望素著者一人洗滌寬抑張公以君名聞遂奉

詔仰體德意躬獲面覆覃厥心膺囚犯大辟當死者務求生理不忌成案卽具情

上請賴以全活者甚衆尋陞本部山西司員外署郎中事然君性高亢好善如已出嫉惡峻加區別雖忤時拂衆不之恤也時貴近持銓衡或勸之往候其疾君正色曰無故之獲平

生所耻窮通有命任自爲之聞者深啣比因錄囚文檄山積  
公不假胥吏一一披閱勞瘁成疾君曰與時不合尚求遷轉  
知幾者固如是乎且吾髮種種不歸何待懇疏乞休休下屏  
居山墅二十餘年足跡罕及城邑惟鄉飲爲大賓一至日處  
一室繙閱古今文籍暇則或杖屨登山或有輿訪逸徜徉自  
得焉嘉靖丁酉中丞潘公鑑惜其遺逸列薦于

朝有司欲強之以行君笑曰吾始脫鞿馭得此真樂年踰六  
旬能與時俯仰堅卧不起君剛方愷悌至于接人言辭有次  
儀度可觀見者如坐春風中且孝友出于天性兄志遠早卒  
遺孤道撫之如子喜飲酒賦詩興到伸紙濡毫瀟灑出塵所

著有知次集咀芹集及創修家譜數十卷藏于家元配任氏  
知縣蘭之女貞淑慈惠綽有母儀先君七年而卒子男四長  
堂選貢入國學積學有待次棠蚤卒次卷次勅女二長適鄉  
進士茹君世昌子業隆次適三原鄉義官武潘子曠孫男九  
天爵天祐天德天秩棠出天祿天麟天和卷出天柱天象勅  
出孫女三長聘丁次聘毛三聘邢蘭桂滿庭皆可遠到天之  
報善人者詎不可徵耶君生于成化壬辰歲五月八日卒嘉  
靖戊戌四月九日堂下是歲十一月二十六日葬于竹塘之  
原予悼其屬纊之托遂因其親友甘通府選狀乃爲之銘銘  
曰 猗差東川素履孔方仕則行義處則化鄉瀟灑詩酒

不羈塵鞅六旬自樂山水徜徉哲人多祉孫子具臧載其休  
問比江水長

涇野先生文集卷之二十八

涇野先生文集卷之二十九

墓誌

南京禮部侍郎致前國子監祭酒翰林修撰兼經筵講官修國史高陵呂柟撰

巡按直隸等處監察御史門人建德徐紳海寧吳遵彭澤陶欽臬編刻

墓誌銘

明江西布政司叅政蘭峯先生程公暨配宜人汪氏

墓誌銘

公諱杲字時昭蘭峯祁門善和里人河南左布政使贈資政  
大夫正治尹諱泰者之子四川按察使昌之兄舉人銳之父  
也銳嘗從遊于鷓峯東所今年予以公事至京銳以其友所撰  
蘭峯公狀拜問銘按狀公舉弘治癸丑進士筮仕戶部主事



歷員外郎中陞湖廣都桂兵備副使乙亥之歲陞江西參政  
嘗是時寧藩宸濠方橫且逆也二司抵任率行警警公不能  
然濠因畜憤比署司印濠多橫索俱與裁抑其親信小校犯  
賍則又懲之濠遂繫其二吏更年不釋仍不同他僚行乞  
恩禮濠怨于是乎深矣及分守南昌濠潛匿劇賊吳十三等  
數十人于府中又假以地方賊情誣參公及許憲使達窘辱  
百端公乃寄乞 休本于其弟侍御時言乃爲時宰陸公  
所遏止姑推公陪點布政以緩其計濠遂誣公與吳十三等  
交通不肯督捕公又同許公預 奏至京因濠本不出又  
爲人中止遷延半載事傳當道聞于

先帝命三法司行勘濠懼遂叛己卯六月十四日僞賊撫按  
三法司官時吳三十等用事公遭網縛獨苦甚次日欲殺公  
祭刀旗賊師劉生者適至勸濠不嗜殺戮公因獲免執公入  
舟時始得通家信命其子銳舉義兵沿江討賊并入京請兵  
銳卽同弟鎔散家財募義士而汪宜人亦盡脫簪珥以資給  
之銳乃請于南都樞江巡撫巡按暨司馬諸公其從弟照徑  
北趨上封事是時公囚于座舡夾春倉內憂憤疾劇水漿不  
下咽者數日后官軍重臨縱火焚舟幾傷其生忽及風脫圍  
野泊地方人登舟知爲公也曳舟至江西城下昇入官衙救  
藥兩月方起庚辰春公歸自南昌銳赴京辯許誓死累疏有

旨程杲既原累抗宸濠被其參害又囑子起兵擒賊報効撫按官參論其情可原准釋其罪僉謂誠如

旨諭當復官起用豈止無罪而已乎公曰予參江藩幸免于死殆天數也初公之任戶部也差通州督糧綜理精詳官運兩便其在填上馬房至使中費不敢撓法昂差散京衛花布勢要不敢折閱比考滿部堂周司徒書以勸慎他日差往山東及閩廣二省也積弊多革地方晏然及六年之考部堂呂公以謹飭公謹書稱後陞員外郎中清譽益彰矣司徒韓公甚加器重乃若守南昌時宦瑾肆姦使者橫徵無虛歲公以堂食充費不擾于民司禮魏彬者亦嘗遣人少違其法即加

鞭箠雖至考察之年陰囑時宰遂菴楊公調改而不顧一時又有謝文選者播弄權衡侵奪官田凌轢鄉黨甚濠也公痛責其家人謝至使其親來言許京堂以徼厚利公堅守清白正直而不改他如葺城積糧築圩練兵于肇慶區畫武備招撫徭魁親臨戎行擒斬賊首于榔桂諸所敷歷秉直樹勲伸冤理枉抗濠之烈豈偶然哉初程氏出周六司馬伯休父封邑于程世望于廣平郡至晉有諱元譚者爲新安太守有惠政民遮留遂家焉至梁諱靈洗者捍禦侯景有功封忠壯公世居篁墩及議口至唐御史中丞澧起兵拒黃巢長子諱仲繁成邠門嚴湖諸處卜吉地于善和里尚書公長子諱令涯

任中奉大夫至宋諱鳴鳳者武魁天下迄元多高人逸士  
國初諱德堅者有古傑士風時世亂各鄉立壘恣行殺戮德  
堅公往來各壘中說以大義所存活者甚多后從我  
太祖征陳友諒于鄱湖有功授行樞密院都事撫浮梁景德  
鎮能解鎮人之危迨淮西數載

太祖卽位大赦天下始歸訪知其賢檄召以疾辭不就所著  
有仁山遺稿都事公生佐佐以公事戍死遼東佐生景華以  
行義高丁卿評景華生顯業儒敦古領應天丁卯鄉薦歷任  
韓潘二府長史是生正治尹者也配贈夫人胡氏生四子長  
曰昂訓科次曰旦典膳次即公次曰昌四川廉使則公之學

問淵源忠貞卓備者蓋非一代之積矣所配宜人汪氏者亦  
邑中望族有女德蓋作配于良者也生子卽銳早志于道凡  
救公于危而明公之心并他日顯揚後世者當有斯子矣娶  
某氏文子女某適某人公生于某年月日 享年若干歲葬于  
某里某山是宜有銘銘曰 有教蘭峯邦之司直策仁戶

曹金穀是飭太守克慈兵備翼翼亦旣參藩貞度維力或抗  
逆濠或拒吳賊密疏旣達亂是用覆命子義兵以匡王國黨  
叛無刑貪婪不墨繫程氏家爲士林則鄙人勒銘用敬享不德

明贈孺人李母董氏暨贈孺人穆氏墓誌銘

南京太常博士李生愈哭謁予曰愈母董氏歿今二十有四

年矣繼母穆氏歿今十有七年矣顧其淑範懿德未銘諸石  
惟先生是問耳母董家世平定東隅人曾祖益都簿琰元左  
丞呂忠肅公忠誠之壻也祖東昌府學訓導福臻父郡庠生  
鑽博學能文有詩名二十八歲沒遺其配張氏年方二十七  
屬節固窮撫教吾母并舅氏故吾母資度貞恪夙有成性也  
稍長伯父鉉叔父教諭朝綱每語人曰此女不凡異日必有  
懿福家君年十二三從舅王舉人佐學聰明強記擅重名  
于時家祖爲擇所對王舅氏與江西副使邑人曹公雷素聞  
吾母賢爲力贊之家祖曰其母嚴明貞烈其女必賢矣媒氏  
往訊外祖母喜曰是李氏才兒也遂字焉及笄歸永君家君

賃屋州居以便學業留吾母于家相去二十餘里乃專奉舅  
姑備竭孝養山下有泉甘冽先曾祖母酷嗜之每晨躬汲以  
供膳飲下上坡阪他婦女所弗堪也家世業農耕犁鋤耨處  
分俱當甚得舅姑歡心其侍家君讀書縫刺于側鷄鳴而後  
卽寢相敬如賓性極聰慧古今孝義大節歷歷能述其槩家  
君年二十四舉于鄉明年乙榜授高陵學教諭先曾祖母不欲  
離吾母也年踰七十就養高陵家祖亦使家二叔應庚應箕  
從學于宦箕因受業門墻云吾母上事祖姑每膳必具其脆  
以稱素所嗜取相家君端儀範甘清苦以誨諸生祭祀賓客  
必敬必潔于二叔書札燈火之費咸爲預處飲食必在寒煖

時未授衣皆與完就及著長短如式雖家君亦不知也畜諸  
兒甚嚴過其前凜凜然衣食不敢擇美惡夜聞兩叔書聲輒  
令之聽謂家君曰二子如其叔足矣若官貧固好消息也乃  
卒于正德丙子正月二十日距生弘治元年三月二十六日  
享年纔二十九嗚呼痛哉三月祖母來撫諸孫家君以湖廣  
聘考與叔應箕偕往叔應庚乃扶柩歸以塋諸兒幼不能從  
也十月家君自湖廣返高陵一顧諸兒會試期迫遂行也過  
家留月餘娶繼先母穆氏父諱翱母李氏郡西隅人丁丑家  
君下第遂同復官高陵先祖母以藐諸孫少失母日夜憂不  
得托及至見拜起動儀雅飭莊重喜曰諸孫復有母矣事先

祖母惟謹先祖母鍾愛亦如先母撫育諸子女食息必察出  
入恐恐然若有傷真若已出雖不肖忘其爲繼母也及先祖  
母歸家君陞鞏昌教授復同抵鞏昌時值隆冬水雪載途過  
關山掖二男以登者十餘里且慰家君曰行道之難如此  
乎及至鞏宅宇傾頽止于後堂索索無儲惟勸家君劾官如  
高陵耳越歲家祖同家叔應斗至鞏竭力供億尤每歎然及  
携家叔應箕將歸家君假十數金爲路費恐不足卽脫簪珥  
以備曰吾在此亦無所用之家祖歸恒稱賢孝焉家君延師  
以誨諸子弟凡飲饌必豐潔敬禮有加曰師道隆則弟子知  
所學也家君以提學大復何公選入正學書院誨群俊士并

修雍大記歲時不返經理家務截然整肅有孟縣劉氏亦官  
茲土其女賢淑即爲予叔聘娶禮物悉裁處如度及來歸相  
待極其和愛諸僚友家咸嘆服至有感化者矣辛巳先大外  
祖母卒哭且絕者凡幾壬午春先曾祖父母卒又哭極痛冬  
先祖母又卒哭不起者五六日形骸骨立嘆曰胡天不仁不使  
婦終養姑也奔歸在途有感輒哭抵家哭于靈輿血卧疾諄  
諄語惟念姑之不見也病十日而逝時嘉靖癸未四月十一  
日距生弘治八年七月二十三日享年亦二十有九嗚呼痛  
哉以二先母之叔懿慈孝成年不及三十而沒仁者果壽天  
果可必乎諸男咸未十歲而失母孰知邊有今日乎家君歷

宦三十年雖以剛正不善事上人淹滯王官不克大施所學  
然冰蘖清苦素行卓偉者實惟內助家叔應庚順慶推官舉  
乙酉科應箕舉甲午科應斗有雅譽于庠其擇師供億二母  
皆與有力焉男七長念舉乙未進士授浙江錢塘知縣娶王  
氏次卽愈同允舉進士娶揚氏封孺人次慈郡庠生娶陸氏  
女淑賢適庠生苗敏學童出次愛少穎悟六歲出語驚坐客  
年十四以疾亡今塋北卽山云嗚呼天何奪母又及其所愛  
耶次慤意讀書可望穆出次懇女二再繼母呂所出也孫男  
二粟念出臬愈出孫女五嗣緒延綿幸不墜家聲者意必其  
餘蔭遺福也乃嘉靖丁酉遇

聖上推恩二母以愈博士秩咸贈孺人矣涇野子曰傷哉俞也吾爲子銘之銘曰 古有道之女迪德之媛或多不壽以委社于其後昆語所謂不在其身在其子孫故爲子孫者數奮思古初竭力于學以求此身之所根也是故既富而立義田方貴而捫瘡痕皆其賦性于父母而因以知學之源也今夫董母以育子而革疾穆母以哭姑而禘魂慈可以照日月孝可以塞乾坤大博覽錢塘不日皆擢爲臺諫責之以言也其所以立身行道揚名後世以顯二母如生存者又豈有外于孝以事君慈以使元元者乎我銘茲石千載如燉

明大中大夫遼東苑馬寺卿東岸先生郭公墓誌銘

公姓郭氏諱震字孟威別號東岸先任陝西叅政劉公一貫者之母舅今任陝西叅政張公邦教自寬者其女夫也初郭之先世吾陝韓城人有幾世祖者徙籍蒲阪居古城黃河之東岸學者遂稱公爲東岸先生云公生而簡重狷介不苟言笑成童時與其兄服賈四方偶奮然曰大丈夫當建勳庸于當世安能伍小兒輩于市井取竒贏邪遂一志儒業日夜不休時年已十七八矣嘗學禮記于王執中先生被其器重督學東郡教公首選籍學當是時少叅楊貞庵致仕家居直躬而行雅愛公文稱其清簡有則然公父已老且病公不鮮衣帶侍湯藥數月及卒寢苦枕塊兩股中寒濕衰號不衰及父



原件短缺

9~10页



病且劇或勸預娶答曰豈有垂命而子納婦者哉終三年喪而後娶弘治甲子王文莊公督學山右試士至蒲適值

國哀以喪禮命題公據所聞于王先生及靜寧吳先生者併附已意著爲論說文莊稱其有定見是年遂中禮魁此後蒲士以禮記登科者鄉論率歸美焉及成辰同子登進士第授大理寺右評事鞫讞詳明評駁不苟廷尉倚重考績書最甲戌晉寺副而母王太孺人遘疾公忽心動

奏乞省親

上允其請歸果病劇曰吾兒來矣即少瘥彘復病弗起蒲人盛傳擬古噬指馳歸云代郡孫太史曰孝弟之至通于神明果然哉服闋補前職戊寅陞河南按察僉事奉

物莫能摧江防以晏東西邊塞馬蕃不虺體退歸林下迥絕塵埃有守輦革旣多其才學不背經豈曰後身如來我銘斯石照此泉臺

南京國子監典籍李舅之配魏氏岳母合墓墓誌銘

岳母魏氏者戶侯諱善翁第八女也自少攻治機杼剪繡組紉及諸中饋之事罔不精緻懿嘉諸女流咸敬羨焉及歸登仕舅當是時兄弟五人同爨也其孝事舅姑曲處諸大小姨及諸妯娌乃益勤機杼剪繡組紉及諸中饋之事滋罔不精緻懿嘉姑及諸姨妯娌尤咸敬羨焉當節序間遺賓祭請召無私厚薄凡甥孫姪娣咸飫其德而飲其馥闔內若有微忿

嘗置去不一辨問大小和睦長聞笑音不聞怒聲恒濟貧拯  
急人誦其德雖漢之鮑桓梁孟何以加諸若岳母魏氏者當  
非古溫任淑惠女流之英乎生天順辛巳八月二十六日卒  
嘉靖甲午十一月初三日享年七十有三歲生男子三人長  
純娶西街王氏沒繼娶原趙村王氏又沒繼娶南街文氏又  
沒繼娶涇陽吳氏又沒次綠早殤次穀縣學生常入科幾舉  
也沒娶東吳里來氏沒繼娶涇陽王氏亦歿女子子四人長  
適柘時舉人也及官至侍郎封淑人云次適本里孫彥景次  
適縣南尚質次適三原生員鄧世恭孫男子二人皆吳出  
長灘娶東街高運同之孫女次沔縣學生出繼于弟穀娶灰

坡劉氏孫女子二長適縣南生員馬應暢死守節次適中  
部舉人劉儒俱純出曾孫女四人采首采繁次藻灘之女采  
蘋沔之女岳母之將合葬于登仕舅其姪學生編書狀言銘  
柘何能辭乃投淚誌之而銘曰 岳舅之葬也柘銘之岳  
母之葬也柘銘之雖于潛德隱行未能詳爲之辭然于厚恩  
素教則亦聊陳其所知矣員員孫子衍及女支載道孔敦垂  
于無期

明榮祿大夫南京戶部尚書贈太子少保石樓先生

李公之配淑人張氏合葬墓誌銘

石樓先生之歿也吳祭酒已志諸墓矣越七八年而元配張

淑人歿將合葬焉其子舉人承恩使兩姪夔龍持狀自汾水來請銘予以憂辭龍再至不獲已述其狀而志之按狀張淑人平陽翼城澗下里人世濟行義清白至父又有隱德嘗感夢乃生淑人天性貞靜孺寡嬉笑長閑女訓內則儀容端重言動居止咸中規矩凡諸服飾惟取鮮潔不事華麗年十四歸石樓先生肅雍自持無違宮事曾大父母大父母時重慶事之孝謹周至飲食衣服必躬必親不以屬人祭祀賓客一致腆潔而自養甚薄俱弗繼也其處伯仲妯娌恩義交盡室人咸悅及舅慈溪先生謝政歸家遭歲大侵而儒素寡積俯仰無所於給石樓先生有憂焉則慰之曰惟無荒學業無

違先志他可免慮也乃竭力機杼以佐家費隆冬沍寒亦不少懈屢際凶年連舉重喪無累也成化庚子石樓先生既登省元明年辛丑卽舉進士授尹樂亭奉養舅姑于任諸從子弟悉令隨侍乃上敦孝敬下慈群幼或延師教授恩同已出弘治己酉石樓先生以監察御史貴封孺人乃感泣言曰妾本農家女誤蒙殊恩無所於報惟願君子夙夜惟寅滋

勵臣節耳及姑譚淑人歿於家哀毀幾不能生綜理喪務巨細畢舉其遇侍妾禮愛篤厚有古樛木小星之遺風焉鄉閭遠近聞者嘆羨以爲難及弘治庚申其喪舅贈公朶毀亦如喪姑焉正德己巳旣拜淑人之封感服不寐謂諸子曰

天恩踰涯分矣前日之報屬之爾父今日之報託諸爾曹爾等惟讀書明理他日誤蒙收錄盡忠樹節爲時名臣不然守身力本不失爲良民可也石樓先生自縣令以至司徒屢歷清要茂著勳功如樂亭之流離歸業戚畹還田城臺息妖巡按所至貪暴肅清妖僧已亂大比得人及爲方面抵劉京之罪戢廖鏗之橫進位都憲按劉郟之奸抗宦瑾之惡若乃戶部之政裁革冗費權歸度支國體增重爲時名卿尤人所誦仰者也鄉黨以爲淑人內助之功居多蓋非誣也淑人平日衣服不重帛食不蕪味俎豆蘋藻必親以事紡績并日未嘗忘念真古妣姜之流亞歟乃歲辛丑七月二十七日無疾而

終詎生天順戊寅五月二日壽八十有四歲子男四人長承宗太學生次承序散官皆早卒承祐散官從子撫養成立者也次承恩舉人女一適楊堯瑞孫男五希夔以恩蔭希龍希尹以例貢希傳希文尚幼曾孫男一曾孫女三俱幼銘曰猗嗟淑人素履孔貞舅姑克孝妾媵有仁石樓先生相待如賓凡厥孫子慈惠同春履素迪義不忘食貧宜爾積行化及六媼內助石樓爲時名臣女訓可式豈啻比隣載其休問千載如新

明贈中憲大夫真定知府裕庵宋公暨配魏恭人合葬墓誌銘

魏恭人之歿也將合葬於裕庵先生其子湖廣按察副使宋君宜遣其子學生承恩問銘予以憂辭不獲按狀先生諱希賢字志學六世祖知遠者自山西徙于鄜州德政坊知遠生斌斌生伯能伯能生鑑俱隱弗耀鑑生綸中弘治壬子鄉舉仕至代府長史配同坊杜耆老清女是生先生者也先生數歲即知禮讓王父臥病數年坐起皆難先生侍養于側不易其地雖曝滌衾褥必手親供事既長嗜學受書於從叔舉人君日與母舅杜器菴共几席雖寒暑不釋卷遂庵楊公試其文稱竒才他日毋杜孺人溝壑疾先生臥不解帶者三月恒求以身代之及莖哀毀逾禮雖越喪期居嘗猶不爲樂痛

祿養之不逮也憲副少時受以小學至范文正公告諸子章誠令勿朗誦恐長史公聞之動心也憲副垂髫教以知禮成性變化氣質諸細故必以不欺爲主及長史公自國學恃亡陞赴代府任而先生感疾還鄜疾革謂憲副曰吾事親不能終養訓子不能有成死不瞑目汝能讀吾書成吾志吾死不朽矣時正德丁卯年三十有八也先生檢身甚嚴即一介不妄取與至有詆其爲迂者每詔赦至州例遺諸生分齋屬邑舊有贈遺先生次往洛川尹如舊隍固辭不從乃寘其金于寢所而歸收衾者得之以告尹大驚嘆曰以爲非人可及也後再值齋遜于貧友至今鄜人以爲美談先生又

善爲文多根理致乃舉不第當非命乎然則畜極未發者將  
不在子憲副所邪憲副爲御史時當嘉靖辛卯 郊祀禮

成贈先生文林郎監察御史戊戌憲副在真定復贈中憲大  
夫真定知府云所配魏太恭人者魏耆老廷相之女年十六  
歸裕庵先生當是特長史公方教諭臨晉乃同裕菴赴任焉  
躬調膳羞承順顏色備極孝敬及杜孺人遘嗽疾身事湯藥  
頃刻不離其側雖當盛暑躬親便溺食不盥手杜孺人曰我  
孝婦也願汝有婦亦當女若乎他日長史公遣收憲副兄弟  
赴大同任恭人以銀二錠付憲副曰此吾翁柴薪也向日汝  
父自京特還何敢私畜以可納上長史公感動不已比長史

公卒哀毀亦如杜孺人居嘗誨憲副兄弟勵志於學前  
脩乃憲副登丙戌進士選授南臺御史言事忤 旨迷繫

錦衣獄親友咸懼太恭人曰御史言官也縱得罪亦其職分  
耳竟復原職會 郊祀覃恩始封太孺人云及誕期南臺

十三道爲蟠菴圖詩予爲之序憲副乃具 勅命冠服并

圖詩序馳上焉太恭人喜甚後就養真定每訓憲副曰清勤  
之外不可輒以重刑加人尤不可輕易喜怒憲副遂以絜矩

字扁諸堂問其義對曰卽俗所謂將心比心耳太恭人甚善  
之戊戌進今封云尋遷湖廣憲副庚子十月入 覲仗道

歸省教戒尤切及今年三月還過廊太恭人已寢疾引憲副

右中指納口中齧良久痛不自勝熟視血至矣即死何心乃  
三月二十一日不起生成化十三年八月四日距卒享十六  
十有五歲憲副卜嘉靖二十一年正月日合葬裕庵先生於  
櫻桃山之陽是宜有銘銘曰有懿裕庵惟介惟良幼爲明孫  
事祖耄荒厥旣嗜學父母咸昌辭金如棄不求厥名細于如  
此况顯德行魏太恭人天合尤良惇誠孝敬悅此姑嫜其結  
婚娶匍匐救喪惠及 戒獲自補衣裳婦無私蓄兼金敢燕舅  
姑納上子職之常裕庵辭金與之同光宜爾有子憲副孔明  
靖恭奉職不懈于涇立身行道爲邦主璋載厥休問千萬載  
長

明通奉大夫四川左布政使繡嶺楊公墓誌銘

公諱淳字重夫號繡嶺向予舉正德戊辰進士仕至四川布  
政使歸而卒于正寢者也初楊之先世累出華陰縣有百戶  
君者徙澄城生政政生敬祖皆居澄城段庄里光祿村明興  
有諱仲微者始徙臨潼縣安業里仲微生和和生讓成化未  
輸粟千餘賑救貧乏乃生子虎贈浙江道監察御史虎生欽  
是生公者也以公初官累封工部郎中加四品服色母王氏  
封太宜人公垂髫時恬靜寡言雅有志向酷嗜詩書時祖業  
頗豐公一志于學不爲富奪祖于諸孫中特鍾愛焉謂其衆  
曰此見其大吾門乎弱冠受詩于季父運使石川翁以儒士

中弘治辛酉鄉試既偕季父僉憲標東翁叔父同業于大學  
公既登進士後觀政兵部授江西道御史時宦官劉瑾索求  
科道瑕疵適決大辟衆皆推避無肯行者公毅然請行大中  
丞屠公喜其勇敢能任事也而瑾惡其同鄉不附已諷當道  
改公工部屯田司主事庚午安化王叛王師于征公爲之先  
事前行辛未被差荊州抽分竹木時川中多盜商販十減四  
五兼以勢要請託齟齬旁午公一切遏抑不行時有青龍之  
謗竟未能污也秩滿陞本部營膳司員外郎管臺基等廠尋  
差遼東查盤軍器甲戌陞都水司郎中奉勅管理通州南旺  
河道浚決潰汚築復堤防一時糧道稱便京儲頓增時中官

方橫舳艫往來陵轡州司需索無算聞公退避有號二劉者  
勅使西域取佛其船百艘所費萬計聲勢赫熾沿河州司懼  
不敢支公移檄檣治其前黨衆歛迹而去

國初工部尚書宋公禮治河有大功禮曹議祀以宋居中有  
司奉行違錯又進都督于其中公具一奏改正且修葺其祠  
宇纂王端毅公 奏議丘文莊公之詩刊爲漕河紀事以  
永宋公之功又嘗發庫帑羨金以修

孔廟其地舊有徐君墓乃延子陵掛劍處也亦築祠立碑以  
表其賢三載再補虞衡郎中未一年陞湖廣寶慶知府南楚  
風淳俗又尚鬼公乃首興學校延經師以開勸生徒四擒妖



巫徧毀淫祠始則詞訟盈庭一判數千繼旬百人再旬十人  
期月之間浮風丕變巡按唐君薦其剛正清明惠德安民有  
某妻外適而娶妾者其妾生子已生員也尋其父不認告之  
公公用古水盆法破其鼻流血于盆中并取他隸血于盆以  
辨同異其民遂抱子而泣歸處其妻如初又嘗 奏革岷  
藩過用桐油船料數萬及強占居民田產數千并擒治其撥  
置之人岷藩上章誣 奏事下湖廣鎮巡會問其參語曰

知府楊某矯枉過直讒致于親王疾惡大嚴因公取怨于官  
校究其立心行已之迹無非守職愛民之心罪固難辭法應  
調用得

肯乃調知鄖陽府才七月陞山西副使奉

勅管理鴈門等關兵備便道歸家適封君遘疾公侍湯藥月  
餘而封君卒人以爲孝思所感也起服除湖廣郴桂兵備郴  
桂楚之南徼也地雜苗夷俗多寇盜有禪光眼者聚衆數千  
肆行劫奪公皆捕平之得蒙 賞賚嘉靖辛卯陞四川參

政不迎離太則具呈 撫臺分俸以養次年陞本省按察

使次年陞本省右轄尋陞左轄公在蜀威茂諸邊將常因蕃  
夷入寇多殺無辜以邀賞賚公累檄諭以禍福勸戒切至諸  
將感悟在臬司其蜀藩知其廉贈蕙金一百撫臺贈金八十  
皆不受貯之庫其爲參政時嘗視篆當放支銀伍萬或曰此

可得羨餘公終不肯放支公平生以清忠自勵慕趙清獻之  
為人俸祿之外一毫無私公子弟有諷其置產業者乃厲聲  
訶之曰汝弟勤耕力學我不爲汝所役使也見着綺羅者則  
曰此天物也汝等可易用乎甲午冬聞太宜人訃公毀悼幾  
不生卽日奔歸自是遺榮養素居室蕭然已亥五月十六日  
丑時有雷震聲異常卽攝衣起危坐有待人弗喻其意是夕  
衆又見星隕于居之西北隅次日延賓談笑間少覺不快遽

不起矣嗚乎痛哉公元配魚氏贈宜人再配姜氏贈宜人張  
氏孫氏俱先卒高氏男東星娶米氏孫男女各一尚幼公生  
于成化十一年十一月十二日享年六十五歲弟翰卜今年  
十二月二十五日葬公于永豐鄉石川河之右具狀乞銘銘  
曰倚大方伯陝士之英秉直不屈歷歷有聲昔在都水宦舟  
寶慶之守湖民用寧藩臬于蜀爾道滋章銘茲貞石千百年光

明義官仇君時淳墓誌銘

君諱朴姓仇氏字時淳世家潞安府南雄山之東火鎮曾祖  
諱述方業醫藥配李氏生承事郎鏞配某里張氏生義官鶴  
配某里張氏於是生君兄弟三人長楫宿州吏目季攔郡醫  
學訓科致仕隱居專治儒書嘗從予遊君其仲也君生而疑  
異語言不同尋常人年數歲即知孝讓義官君教以詩句輒  
了其義甫十二卓然自立如老成人義官君或委以家事任  
之不辭出謀發慮及過其右其有所呼召雖寢必起雖食必  
吐時家範未立一日宴賓隨俗或用女樂君深憎嫉客賜食  
肉出門盡哇於地義官君竊喜其剛正謂坐客曰成我家者

是子也弘治八年授例義官代父專理家事兄弟及再從者五人焉吏目遊宦宿州森儀賓城府桓業膠庠欄寓醫學君獨克厥家錢谷金帛悉出其手毫髮無私而又慷慨奮發事得其理人得其職恩信洽於内外人皆悅服族人有誣訟其家者欲陷死地乃即赴上書申理聿獲辨明弘治十六年七月義官君卒兄弟三人哀號盡禮葬後同處一室正德五年乃議立家範舉行呂氏鄉約願遵約得二百六十餘家焉置深衣巾履各一立勸懲簿以憑賞罰設義廩以便歛散是年五月五日忽報大夥流賊奄至君即率合家婦女趨城至六日果至大劫東西二火鎮戍殺虜掠男婦不計其數惟君家

獲免賊去後家食燒谷以存性命好者貸人止收原本燹者減半取償文券既毀人皆自守其數乃與兄弟議曰往時利息三分今遭此禍可取二分以爲常例不數日息完於是先構祠堂次營居第次列諸堂各扁名義設義方以教宗人建義學以淑鄉黨築藥樓以濟天死立義塚以葬貧乏始雖會議而經營提督君實多與其力雖經賊火修復視昔愈盛流賊所過婦女死節者四人君因激其儀賓同諸會友白巡撫王公獲給葬銀奏聞鑿碑建祠小領郡守曹公進善即委公董其役乃輟家事盡心營治輒益已財祠堂既成貞女父兄以其女所遺繡枕二事來贈君獻諸父曰此烈女遺物遂珍

藏間出以教示內人子煥求昏原氏女既納采矣其人曰從俗則吾女婦如行古禮則吾不能從也君謂二兄曰吾家娶婦入門有不守家範者去之況尚未入門者乎此人昏禮尚不欲行則其女不能守範可知與其亂吾家範不若棄之不過亡數十金耳遂與絕昏更聘六世同居義門李氏女焉正德十五年吏目允卒君傷悼如失左右手本都六里人舊窘差稅久逋郡公君使人俞以禮義稅得完納太守欲犒花紅則辭以祖母之服是後有例許併里分君與儀賓費百五金併爲三里自此二稅諸役必以本家銀貲依官價代輸後故原本不取其息人皆便之是歲大飢白於母氏先自族人次

及隣里錄四百五十八口計口給粟多寡有差嘉靖二十年又飢復賑之五年建立書院於東山以教鄉之俊秀七年改正本村東嶽廟爲里社壇祀土穀之神恐禮未允乃遣醫官之南都謁何栢齋馬谿田及予三人就正兼詢鄉約書院事宜三人各有撰記公以書院在東因號君曰東山八年又飢斗米九十錢餓莩盈途君於本家便地掘一大坑又於西火王鑄地掘二大坑埋瘞死者因給錢六文以償埋者又免負債人銀本五百金重給銀本三百其錢穀之息通減一分九年起役修城乃督本里人獨當半面城工垂完君忽心焦點衆里俄而城覆里不一失皆仰嘆曰不有相公我輩已爲隍

中之泥矣聞者駭異十年夏旱人心皇皇衆會公議禱雨君  
令合村男婦老幼前三日齋沐各家年長一人親詣會所齋  
宿每早焚香祝告三日即雨是歲大熟十一年又旱復率衆  
祈禱如前得雨日亦同人皆驚羨云至誠感神焉君凡遇祠  
祀必變食遷居務期感格臨祭肅然君四歲育於繼母閻氏  
旣長晨昏定省出告反面事無大小稟而後行疾則親視湯  
藥衣不解帶及卒哀毀踰禮形容骨立杖而後起擯廬墓三  
年不御酒肉後垣群槐慈烏徧巢及歸見親故室頭觸仆地  
時已六十餘矣路守宋公主榜其廬曰二孝廬又大書扶持  
風教四字以嘉之復疏其事於朝 詔表其門云君雖與

人談論移時肩背竦直身不少動手足亦不移處家喫緊尤  
慎閨門憐家童曇年踰八十月給米三斗以終其年郭文貴  
年老無子每月給米二斗以延其生文貴死廩給其妻不絕  
收養祖母之裔張邵自幼至壯且與娶室他若置義學田於  
峽堰之西以贍鄉士不能束修者和順王都憲公學行重於  
時其所著書有博趣齋稿乃刻其書以傳多義舉也及煥補  
本府弟子員教之曰讀書本爲明理治國先於齊家不願汝  
工文辭以取富貴也惟願守吾範耳自鄉約之行三年矣君  
領約事人識禮讓盜賊屏息僧道遠迹奸慝不生淫樂不作  
風俗大變有小爭鬪君爲申理曲直咸得其宜鄉里息訟遐

邇嚮化有若西火霍村平家莊趙家莊遠而陵川之南洎壺  
關之柏林皆從約也郡守周公吳素慕其名乃大置酒食召  
請至城時諸約至者千餘人周親洗盞酌君求贊郡政乃秋  
七月二十五日正終據生成化九年六月二十二日享年六  
十有八吊客千餘人行者哀於途婦女嗟於室配王氏繼王  
氏再繼董氏俱名族男一曰煥生負王出先卒即娶義門李  
氏者也女五一適教授陵川武儀之子思彤一適尚書後蔭  
城李琨之子一適西火巨族袁佐良之子遂一適戶部員外  
高平申廷賢子之監生去垢一尚在室俱董出孫男一即階  
府學廩膳生娶袁氏曾孫男一小字勿情曾孫女二初君將

歿醫官在側憤恙成疾既歿越月疾少間命君之孫階具狀  
走使請銘義不可辭遂即其孫階所具之狀而次第其事以  
銘之銘曰

有毅東山受性直剛見善則從見義則行家範既立具鄉約  
常僮僕爰化鄰境爾程遺骹收瘞孤貧是襄神祖來格宗戚  
咸章行年七十無忝所生相厥懿行先生彥芳銘茲貞石千  
載爲祥

明贈工部右侍郎兼都察院右僉都御史南峰先生

潘公暨配淑人施氏墓誌銘

明贈少司空南峯先生潘公歿于嘉靖乙酉十二月十九日

詎生天順壬午三月二十五日年六十有四歲配淑人施氏  
先公六年卒詎生戊寅四月二十三日年六十有三歲俱已  
藁葬于韓八塢口矣其子今工部左侍郎兼都察院左副都  
御史鑑以塢口之近河也將於某年月日遷葬于象山之陽  
謂柩爲同年友且舊史氏也乃以族弟河南參政鑑狀遣使  
請墓詔按狀公自少孝事龐隱公龐隱公之歿也公視伯父  
貴安公亦如龐隱公其事母呂氏菽漿以盡力友其弟璘環  
瓚甚篤厚瓚年少呂獨憐愛之以公之能撫鞠也恒以爲悅  
公素不治產業賴璘環精心經營以爲養其約束群從無越  
矩矱賓祭必以禮而自<sub>曰</sub>御朴素後雖貴顯亦若寒士至其輯

世譜以明宗架榮陽石杠以濟涉者而里之孤嫠尤極意撫  
恤下逮<sub>或</sub>獲亦慈惠無虐里人有夜盜所儲粟者公窺得其  
人低聲謂曰吾安忍汝爲此汝速去明日隨<sub>我治任且</sub>捐粟  
與之他日竊者別犯被執自言公事求免公固未嘗與人言  
也平生口絕吐叱不事博奕對客惟談論古今不涉謔笑一  
切玩好紛華無少餘累恥與奔謁邑大夫李子士翔者尊禮  
視之延之飲射傾意考問一時英達成謂公姿貌玉立身無  
惰容而接物溫郁得諸程伯子與人言鑿鑿不妄行之以忠  
恕得諸司馬君實至於鄉之衡辯者望容而息類王彥方曾  
次坦洞未嘗惻其喜怒類黃叔度其亦微士之著龜典刑乎

及其晚年凡名山古刹必棲遲以挹其勝而童冠相隨振衣  
散步濯于清泉哦于茂樹盖有得于道而自樂者也公髫髻時  
凝然如老成不類群兒龐隱公性最嚴毅嘗以事麾公立雪  
中母引之避去公拱手答云少候父命聞者異之稍長師事  
盲士穉士竒受尚書尋遊黌宮文名蔚播弘治庚戌治龐隱  
公喪一以家禮不用浮屠屢舉不第遂不復出結廬以隱因  
號南峯鄉士擔簦踵接鑑與主事弟鉉皆受業焉復有父子  
相繼出其門下者遂稱南峯先生公又倡築凝秀書屋別延  
師以訓子鑑有詩性拙不妨勤作所家貧端合儉爲圖及鑑  
年十九鄉薦捷使及門公乃啓講旣畢方出人服其度鑑舉

進士父病京邸或勸公禱乃拒之曰有命未幾鑑受命南大  
理評事迎公祿養乃以詰奸正辟訊寃平反訓之尋被錫命  
繼配施氏亦封孺人後鑑以公垂白在堂不欲遠仕公以盡  
忠報國榮達所親勉之及鑑進副使時復上疏辭官不允公  
益催促不使頃刻違命然則鑑自今官也積大卿相以爲我  
明名世之臣上逮于公流芳千載又奚但今日贈少司空已  
邪初潘先世周人中徙閩之三山唐李諱逢辰者詣闕上書  
不報乃避居婺源桃溪之源自源而南流五六里爲孔村又  
南二里爲寨峯皆桃溪也逢辰卜其深處以居八傳至宋學  
諭諱度者復徙孔村度生泳泳生紹祖紹祖生元昇元昇生



玄保玄保生嵩高嵩高生再和即公之曾祖也再和以弟未  
嗣代戍于五開衛而卒鄉人高其行再和生濟濟生曾遺又  
名遺安字景德剛方秉義自號龐隱因以扁堂蓋取龐德心  
耕稼遺子孫意也今贈工部侍郎配呂氏贈淑人是公之父  
母也然則公所源流者亦遐哉偉乎公諱琦字良玉配施淑  
人生二子長卽鑑娶澧溪呂氏累封淑人次錦娶芳溪方氏  
女一適泉田宋儒許月卿先生之裔孫鑰孫男五溫澄俱  
恩蔭國子生沂國子生海沛孫女四曾孫男二是宜有銘銘  
曰猗下翁良素履孔臧遵訓龐隱 立雪不忘學既有得士  
滿門皆南峯小隱經史攸明凝秀出屋司空乃揚忠孝之教

厥訓孔洋世譜攸輯架杠榮陽周窮化盜比王彥方鄉人著  
蔡南國紀綱司空方戍晉位名相布德字內厥聲洋洋邇源南  
峯象山之光千萬載長

明兵科給事中北郭先生劉君墓誌銘

君諱琦字廷珍別號北郭陝西延安府洛川縣人也舉正德  
甲戌進士觀戶部政授行人司行人嘉靖乙酉擢兵科給事  
中時值 聖上新政卽陳六事且嘉納焉嘗被

旨差放冬衣布疋因極言侵漁十一弊且日詣衛衙支放雖  
經寒暑遇風雨亦不廢僚長嘗推其勤勵不可及錦衣衛多  
權石乃愈振風采有玩慢者卽疏治其罪騰驥衛悉統力士

又率內監所養人也慣以私憤冒領官銀以取利君陰識之  
兼廉得其情數十輩俱罪之是年冬當述職期多有假稱緝  
紡赫詐人財者君上封事請 旨下金吾捕治併上親賢  
臣遠佞臣之疏他如峻宮墻之禁嚴宿衛之鋪一劾而中官  
逮罪者四十人皆人所不敢言者也一時京邑爲之肅然嘗  
存恤軍士嚴督五城及諸衛司勿得匿情其假充軍妻者皆  
察治之衛司謂給事真神目也未幾奉 命清軍條舉三  
十事切中特弊咸下司馬勘行凡比試襲蔭同事諸大臣中  
官多請囑以從寬貸君竟劾治之雖事干勳戚權貴亦不顧  
也是時京師大飢乞丐劫奪莫之能禦君請行捨飯開倉之

政飢民存活殆億萬計盜賊橫行尋以屏息是時諫臺多以  
罪遣君又疏愛惜人才有少過者得赦不深咎其點視草場  
馬匹然多羸憊權貴有私耗之也奏劾既舉馬至秋卽繁碩  
矣其河南關司都司相通爲奸以庶易嫡君發其罪乃俱罷  
官君乃衛卒病發悞入宮門君又極力請救以從輕典其旦  
夕承弼不敢專於嚴也妖人有犯繫晉獄當事者惕於權勢  
莫任其咎君抗疏陳其顛末上命山西鞠訊得 旨依擬  
發落然妖人者又爲權貴救庇君遂發其隱言過急切乃自  
是謫戍遼東潘陽衛矣厥後 聖上猶諒給事之心曰劉  
琦者是嘗進讜言者也乃因 東宮之建大赦天下得還

原籍抵家五年痲疾作而卒然則君亦不可謂不遇也君子  
觀政時嘗解年例銀之雲中毫髮必記于官後又解銀陝西  
請大司徒原對印封王則稱對差謬及開原封方伯慚謝其  
爲行人也差葬保安王府卽檄教授令舉會典定禮及古制  
數十條諸宗室遵之事竣綵幣諸物一線不取人於君進身  
之始已瞰其後日之忠直也少從父聞易州經衛卽好誦書  
史不同群兒嬉戲又知奉甘旨于父母而自甘粗糲尋易州  
遣君就學殷先生後謂易州曰賢郎初試必出愈奇吾不能  
爲若師矣明年還家邑尹嚴君面試月給云米特嘉禮重時  
東川王公守延安考德縣學文在首選其後以鄉有術巫看輿

昇神曰金龍二子道路祈福君毀其輿執巫者請縣尹田侯  
田甚重之尋大妖扇惑鄉人君又上書田侯云履霜堅冰當  
防其漸田厭其繁稍不聽用後田妻子皆遇害邑有孤貧馮  
姓者君撫畜之病卒于宦邸寄柩僧舍及成還仍携櫬歸葬  
于里凡鄉有公且死者必賙殯之計給棺者四十餘家是知君  
童孺書生時以及患難顯微之際皆不忘忠孝仁義之道如  
此也始祖諱曰承先元末避兵洛川因家焉嘗以賢良徵仕爲  
河南按察副使以至其祖諱姜生易州公配孺人廉氏感異夢  
寔生君焉則石之所源流可不謂遠且厚哉君配景氏太學  
生運之女媿德于君者也子二人受愛皆廩膳生受娶屈氏

愛娶李氏女二長適廩膳生白雲次適景載物君生於成化  
壬寅七月一日卒于嘉靖辛丑八月四日享年六十歲壬寅  
年月日葬于城北大石山之陽先是受具行狀使愛來謁銘  
予以先母之未許也又臥病床褥固辭愛三至請益乃次  
序其狀而銘曰於穆

聖皇得臣忠良緊劉諫議載職有常有聞必告有見不忘辭  
瑣達貴甘戎五行 聖皇憐汝赦還于鄉君仁臣直世際  
平康勒銘永世大石山陽浴入清渭並河洋洋

涇野先生文集卷之二十九

